

Thò Mòiq Da Pêtrô 1 Pêtrô Bàu Patô Adroi

Hiniq wa Bàu Xèm Da Sech:

Mangai nhàn yóc thò cô khoi chiuq bacc biac 'bàt thù wa padit padiang. Wì haq khoi 'bìq parai pariang ta òiq ca gùng Rôma.

Mangai Achih wa Hanam Achih:

Pêtrô achih thò cô. Bàu achih tiah ca bàu achih ta pôn toq sech Bàu Lem wa bàu anoi da Pêtrô òi ta Sech Bìac Yiang Hadròih. Sech cô khoi achih hanam 64 Atiq C.

Bàu Anoi:

Sech 1 Pêtrô hnài biac mangai lùì Chuaq phai broq. Mangai lùì Chuaq phai lah axong khoi ca wì ma tiaq wì ta crong taneh cô. Ta jò wì haq chiuq nan xa cô, wì i can ngèh gòm nhàn yóc can 'ngah 'ngai nhò biac am dech da Boc Plình. Thò cô hadai hnài wì phai rìh can rìh hadròih trùh lùch 'nhòng nan xa cô.

Rìm 'Nat:

1. Bàu Gòi Hmài: 1:1-2
2. Manè Búi Taiq Bìac Am Dech wa Bìac Dèch Claih Da Boc Plình: 1:3-12
3. Can Rìh Hadròih: 1:13-5:11
4. Hagleg i Achih Thò Cô: 5:12
5. Bàu Chao Pulùch: 5:13-14

Bàu Bòch Hmài

¹ Au cô Pêtrô mangai sùq đò da Chuaq Jêxu Crich, Achih thò cô ca 'bài mangai ma khoi jah rài, aih 'bài mangai ma 'nang pac lac òi ta 'bài gùng Bôntu, Ga-la-ti,

Cap-ba-đôc, Asi, wa Bi-thi-ni, ² oh daq khoi jah raih tiaq biac loq adroi da Boc Plinh, aih Baq, pì jah wìa hadròih nhò Yiang Hadròih, ðòiq ðì tiaq Chuaq Jêxu Crich wa jah broq hreo nhò mahem Haq.

Waiq xìn biac am dech wa biac catèm jah bình halùih òi ti pì.

Xôxech Òi Ta Diac Plinh

³ Manè apôi Boc Plinh, Baq da Chuaq Jêxu Crich da bèn. Nhò can loq xa-ôch càn caiq da Haq, Haq khoi broq ca bèn jah xa-ông hlài, jah i biac ngèh gòm da can rih nhò biac rih hlài da Chuaq Jêxu Crich enh can cachit, ⁴ ðòiq jah nhàn yôc xôxech ùh hù hnhung, ùh raliang, ùh taclah, khoi don ðòiq ca pì òi ta plinh, ⁵ nhò manoh lùì, jah cwìang itai da Boc Plinh wèq ban ðòiq jah dèch claih, aih biac khoi padon ðòiq pa'noh ta 'nhòng ma atìq. ⁶ Lem bùì ca biac aih beq, 'nhac ca manàiq cô pì chiùq mango ca biac baxa thù bacc trong ùh hiaq dùnh, ⁷ ðòiq biac lùì ta manoh joq 'nàng da pì, jah doi yi canaq, yi lem ca wang ma loq hnhung cađac, 'nhac ca biac lùì manoh chiùq baxa thù, èh jah pa'noh xam bàu manè apôi, padèch ha'nhèq wa broq 'ngah 'ngai hiniq Chuaq Jêxu Crich jò Haq trùh hlài crông taneh. ⁸ 'Nhac ca pì 'nhòq hnoq Haq, pì khoi loq waq ca Haq. 'Nhac ca manàiq cô 'nhòq hnoq Haq, pì xôq lùì Haq, pì jah bùì ðìq jaq ùh i ca bàu jah doi, wa jah bình halùih 'ngah 'ngai lem lình, ⁹ 'màng aih pì jah nhàn biac pachì ðòiq da manoh lùì, aih biac dèch claih mahua yiang pì.

¹⁰ Taiq biac dèch claih aih, 'bài mangai capoch thai Boc Plinh khoi ti chaq, ti bòch ðìq ca jaq panim wa hadai khoi capoch bàu loq adroi biac am dech trùh ca pì, ¹¹ èh wì haq chaq ðòiq loq 'nhòng leq wa 'màng leq, ma Yiang da Chuaq Crich òi ta wì haq khoi patô am ca wì haq, jò Boc Plinh doi adroi biac jìq xa da Chuaq Crich wa biac 'ngah 'ngai lem

lình atiq ca aih. ¹² Bìac cô khoi mahno ca wì haq, ùh xài wì patih ca dađeh, mahaq patih ca pì. Bìac wì haq ma khoi capoch, aih bìac da 'bài mangai ma khoi anoi hnài Bàu Lem ca pì nhò Yiang Hadròih loh enh Plình, aih bìac 'bài 'bình plình 'mòi hadai điq jaq enh loq.

Trong Rìh Hadròih

¹³ 'Màng aih pì ep yốc dèh manoh hèm cajap cajình, wa khòh đòiq điq ca bìac ngèh gòm pì ta bìac am dech da Chuaq Jêxu Crich jah am ca pì ta hì Haq mahno loh, ¹⁴ Tìah ca con caiq loq đì tiaq, apaq broq tiaq dèh manoh ham enh troi jò 'nhòq 'nì ca Bàu Lem, ¹⁵ mahaq taiq Haq ma khoi creò ca pì hadròih, 'màng aih pì hadai phai caq òi hadròih ta rìm trong, ¹⁶ taiq Sech Hadròih khoi i achìh: "Au hadròih, 'màng aih pì hadai ep hadròih."✠

¹⁷ Wa tàng pì creò Haq Baq pì, Haq ma yốc bìac ta-atoq joq 'nàng đòiq hadrah mangai troq troi bìac broq da rìm ngai wa ùh jò leq gen can, 'màng aih pì khòh caq òi xam manoh loq iu yùq jò òi rìh ta crống taneh. ¹⁸ Ma jah 'màng aih pì loq ùh xài nhò hiniq loq raliang hech troi 'bac, wang, ma rồc pì loh khoi enh trong rìh ùh loh cleq khoi nhàn enh boc yaq da pì, ¹⁹ mahaq nhò mahem da cla Chuaq Jêxu Crich, tìah ca mahem Trìu Con ùh i ca tôiq, ùh i ca teo, ùh i ca xít. ²⁰ Haq khoi jah padon đòiq adroi ca jò broq plình crống taneh, mahaq mahno loh ta 'nhòng ma atiq lùch cô am ca pì, ²¹ nhò Chuaq Jêxu pì lùì Boc Plình, Haq ma khoi broq Chuaq Jêxu rìh hlài enh can cachìt wa am ca Haq can 'ngah 'ngai lem lình đòiq pì i manoh lùì wa bìac ngèh gòm canòm Boc Plình.

²² 'Màng aih nhò loq đì tiaq bàu joq 'nàng, mahua yiang pì khoi 'neho hreo, 'màng aih pì ep điq ca manoh loq waq ca dabau, ²³ ma jah 'màng aih pì khoi jah xa-ông hlài, ùh

✠ 1:16 1:16 Lêwi 11:44,45; 19:2.

xài enh pliang adrech ma loq raliang hech, mahaq enh pliang adrech ùh raliang hech, aih nhò bàu rih hloi wa cajap cajinh da Boc Plinh. ²⁴ Ma jah 'màng aih:

“Con mangai wì aliah tìah ca nhat;

rìm biac ma 'ngah 'ngai lem linh da wì haq tìah ca riang,

tìah ca nhat; nhat croh, riang hadrùih.

²⁵ Mahaq bàu da Boc Plinh jah òi hloi hloi.”[☆]

Bàu aih, aih Bàu Lem ma khoi anoi hnài ca pì.

2

Cato Hmu Rih

¹ 'Màng aih, pì ep cađac đống đìq rìm biac ngang dù, biac padô alúan, biac loq 'nùt, git tagìq wa rìm biac capoch jù lê, ² phai tìah ca 'bài con nga neo xa-ông, loq ham enh ca tôh hadròih da Bàu Chuaq, nhò enh aih èh pì jah yòng càn ta biac dèch claih, ³ tàng pì joq 'nàng khoi jah loq Chuaq i manoh khôn khaoq.

⁴ Èh phai trùh haten ca Haq, tìah ca Hmu Rih ma con mangai khoi cađac, mahaq Boc Plinh khoi ràih Haq ma đìq jaq lem canaq, ⁵ pì hadai jah tìah ca hmu rih jah yõc đòiq broq wìa mòiq toq hnem hadròih, jah wìa mòiq pajàu hadròih, pì jah dèch am ngè tadreo hadròih broq lem manoh Boc Plinh nhò Chuaq Jêxu Crich. ⁶ Ma jah 'màng aih Sech Hadròih khoi achih:

“Cô, Au khoi đòiq ta Siôn mòiq toq hmu gàu mùm hnem khoi jah ràih wa lem canaq.

Mangai leq lùì canòm ca Haq,

èh ùh jò leq camaih.”*

⁷ Ma jah 'màng aih ca pì ma lùì, Haq đìq jaq lem canaq, mahaq ca wì ma ùh lùì:

[☆] 1:25 1:25 Êsai 40:6-8. * 2:6 2:6 Êsai 28:16

“Cato hmu mangai thòq broq hnem khoi cađac
khai jah wia hmu gàu mùm hnem,”†

⁸ aih:

“Mòiq cato hmu tət khech
broq ca wì haq tacro.”‡

Wì haq tacro taiq wì haq ùh dì tiaq Bàu Chuaq, bìac aih
khai jah pachì òiq ca wì haq.

⁹ Mahaq pì xinoi khai jah raih, khai jah broq pajàu da
Boc Plình, broq jàn hadròih, aih jàn da Boc Plình, òiq pì
anoi hlài bàu manè Haq ma khai creò pì loh enh nòi clam
clòiq òiq jah mùt ta nòi 'ngah 'ngiang lem linh da Haq.

¹⁰ Adroi cô nèh pì ùh xài con jàn leq, mahaq manàiq cô
pì khai broq con jàn Boc Plình; adroi cô nèh pì 'nhòq jah
nhàn yǒc bìac xa-ǒch, mahaq manàiq cô pì khai jah nhàn
yǒc bìac xa-ǒch.

¹¹ Ôi oh daq au ma loq waq, òi ta crǒng taneh cô, pì tiah
ca mangai tamoi hangai òi òò, au xìn pì phai wia enh bìac
ham chac xech aih tajraq hlài ca mahua yiang pì, ¹² mahaq
phai rih ma lem ta'ne mangai jàn 'noi, òiq jò wì haq
capoch 'mèq ca pì, wì haq hnoq bìac lem pì broq, 'màng
aih wì haq jah manè Boc Plình ta hì Haq trùh hadrah crǒng
taneh.

¹³ Taiq Chuaq, pì phai dì tiaq òiq ca ranenh chenh phù
da con mangai pa'noh, 'nhac ca bùa mangai ma i cwiang
yi enh 'nhèq, ¹⁴ loq mangai cwan, mangai bùa ma thê trùh
òiq baxa 'bài mangai ma broq bìac dù, wa òiq manè
'bài mangai ma broq bìac lem, ¹⁵ ma jah 'màng aih Boc
Plình enh pì broq bìac lem, òiq broq hatenh đac ca bàu
awàt da 'bài mangai blùng. ¹⁶ Pì rih tiah ca 'bài mangai ùh
tawac ùh pakènh beq, mahaq ùh yǒc bìac ma ùh tawac ùh
pakènh aih òiq gahnàp đac bìac dù, mahaq ep loq dađeh

† 2:7 2:7 BCP 118:22 ‡ 2:8 2:8 Êsai 8:14

broq hapǒng da Boc Plính. ¹⁷ Khòh loq iu rìm ngai, loq waq con caiq Chuaq, loq yùq crè ca Boc Plính, wa loq iu bùa.

Dua Chìuq Xa Da Chuaq Jêxu

¹⁸ Ôi mangai broq hapǒng, ep iu dèh craq xam dìq ca manoh loq yùq crè, ùh xài toq ca mangai craq i manoh lem, mahaq hadai iu ca mangai craq 'mèq manoh. ¹⁹ Tàng mangai taiq Boc Plính haq chìuq jìq manoh, chìuq nan xa taiq biac ùh ta-atoq, aih biac đàng ca manè. ²⁰ Tàng broq biac dù 'bìq wì jêh, èh nui chìuq àt, biac aih i cleq đàng ca catèh ùh? Mahaq tàng pì broq biac lem mahaq xôq chìuq àt jò 'bìq baxa, aih biac đàng ca manè enh ngia ca Boc Plính. ²¹ Taiq biac cô raq pì khi jah Boc Plính creo, ma jah 'màng aih Chuaq Jêxu Crich khi chìuq jìq xa đòiq broq dua am ca pì, waq ca pì cadiang tiaq teo jènh Haq:

²² “Haq ùh jò leq broq tôiq,

hacùng Haq ùh jò leq i bàu amòng.”§

²³ Jò wì hanip Haq, Haq ùh jò leq hanip hlài. Jò chìuq nan xa, Haq ùh jò leq hacam hlài, mahaq Haq am chac dađeh ca Haq ma hadrah ta-atoq. ²⁴ Haq yǒc dèh chac đòiq pòq tôiq lôì bèn ta long pagat, waq ca bèn mangai khi cachit ca tôiq lôì, jah rìh ca biac ta-atoq. ²⁵ Ma jah “'màng aih pì tìah đeh ca trùu lam lac,”✧ mahaq manàiq cô khi jah wìh hlài ti Mangai Ban Trùu, Haq Mangai Wèq mahua yiang pì.

3

Biac Broq Troq Da ǒng Mai

¹ Hadai 'màng aih, pì mangai mai phai iu tiaq dèh ǒng, èh tàng mangai ǒng ùh tiaq Chuaq, mahaq nhò biac caq ǒi da mai, ùh xài nhò bàu haq capoch, èh ǒng haq hadai tiaq, ² jò wì haq hnoq biac caq ǒi hadròih wa biac loq iu da

§ 2:22 2:22 Êsai 53:9 ✧ 2:25 2:25 Êsai 53:4,5,6.

pì. ³ Apaq enh toq nègè padì enh gùng troi padì xàc, axràng ca nhàn xam wang, loq eo cwàn nhòm nhìn hrìn, ⁴ mahaq khòh loq enh nègè padì ùh jò leq hnhung, aih xam manoh habùat wa hatenh òi enh dalam; biac aih òi jaq lem linh enh ngìa Boc Plình. ⁵ Aih trong caq òi da 'bài mangai cadrì hadròih calah nèh ma i manoh nègè gòm Boc Plình khi padì ca dadeh, èh khi loq iu tiaq dèh ỡng, ⁶ troi Sara òi tiaq Ap-ra-ham, creò Ap-ra-ham craq dadeh. Tàng pì tiaq dua Sara broq biac troq, èh pì jah wia con cadrì joq 'nàng da Sara, wa pì ùh hìaq yùq crè.

⁷ Pì mangai broq ỡng hadai, jò rìh pajùm dèh ti mai, ep hèm trùh dèh ca mai wa loq waq ca haq taiq haq mangai yi iuq, ma jah 'màng aih wì haq hadai pajùm ti pì jah hùang biac am dech da can rìh, waq ca bàu waiq khàn da pì ùh hìaq i biac cleq khech tàt.

Chiuq Xa 'Nhac Broq Biac Lem

⁸ Òi òi òi ca pì ep i manoh pajùm mòiq, i manoh loq tamèt, loq waq ca dabau tìah ca oh òi, i manoh loq xa-òch, ùh catèh dadeh, ⁹ apaq yòc biac dù ca'naih hlài biac dù, hadai apaq yòc biac waiq hanip ca'naih hlài biac waiq hanip, mahaq ep waiq xôq ramòt ca wì haq, taiq biac cô raq dài pì khi jah creò òi pì jah nhàn yòc xôq ramòt.

¹⁰ Ma jah 'màng aih:

“Mangai leq nègè enh can rìh
wa enh hnoq 'bài hì lem,

èh ep wèq dèh rapet,

apaq capoch bàu dù wa hacùng claih ca biac amòng.

¹¹ Ep wia hangai ca biac dù wa phai broq biac lem;

Ep ti chaq biac can catèm wa hloi hloi lam tiaq biac aih,

¹² Ma jah 'màng aih mat Chuaq ngan hnoq mangai ta-atoq,
Don Haq tamàng bàu waiq khàn da 'bài mangai aih;

Mahaq Chuaq tajaq hlài ca wì mangai broq biac dù.”*

¹³ Cabô jah broq 'mèq ca pì tàng pì broq biac lem xam manoh panim? ¹⁴ Mahaq tàng pì chiùq nan xa taiq broq biac ta-atoq, èh pì jah xôq. “Apaq yùq jò wì loq ta'nhùq, hadai apaq crè,”† ¹⁵ mahaq phai padèch Chuaq Jêxu Crich òòiq Haq broq Craq ta manoh. Hloi hloi phai padon tèò hlài bàu da wì ma bòch gleq pì ma tiaq Chuaq, èh pì tèò wì haq xam manoh habùat wa manoh loq iu. ¹⁶ Khòh wèq lem dèh manoh loq, òòiq ca mangai leq capoch bàu jù lê ca biac caq òi lem da pì ta Chuaq Jêxu Crich, wì jah camaih. ¹⁷ Tàng Chuaq enh pì chiùq nan xa taiq pì broq biac lem, aih lem yi hnao chiùq nan xa taiq broq biac dù.

Mangai Ta-atoq Cachit Am Ca Mangai ùh Ta-atoq

¹⁸ Ma jah 'màng aih Chuaq Jêxu Crich khoi cachit ca tôiq lôi mòiq yàng raq khoi tôm tàu. Haq Mangai ta-atoq thai ca mangai ùh ta-atoq òòiq 'ràng bèn trùh ti Boc Plình. Phàn chac hamac Haq khoi chiùq cachit, mahaq Haq khoi rih hlài nhò Yiang Hadròih. ¹⁹ 'Màng aih Haq lam anoi 'noh bàu ca 'bài yiang ma òi tù, ²⁰ enh 'nhòng da Noah, 'nhac ca Boc Plình khoi chiùq ta'nhùa òòiq wì haq canao loq dèh ca tôiq lôi jò Noah broq bong, mahaq wì haq xôq cadoq manoh, taiq 'màng aih jò diac càn ta 'nhòng Noah, i rahem ngai raq ma jah dèch claih ca diac. ²¹ Diac càn hanam aih broq dua 'mù ca biac 'baptem òòiq dèch pì hì cô, ùh xài òòiq broq hadròih ca biac amùa amech da chac hamac, mahaq aih biac am ca manoh loq ca dađeh jah lem enh ngìa ca Boc Plình nhò biac rih hlài da Chuaq Jêxu Crich, ²² Haq ma khoi hlài ta Diac Plình wa manàiq ha'ngui pah 'ma Boc Plình, òiq ca 'bài 'bình plình, 'bài ma wèq cwàng wa 'bài cwàng itai ma 'noiq òiq đõng òi enh 'neq ca Haq.

* 3:12 3:12 BCP 34:12–16 † 3:14 3:14 Êsai 8:12

4

Can Rìh Ma Neo

¹ 'Màng aih, Chuaq Jêxu Crich khoi chiùq jìq xa trong chac hamac 'màng leq, pì hadai ep padon dèh manoh chiùq jìq xa 'màng aih òi, ma jah 'màng aih mangai leq khoi chiùq jìq xa ta chac hamac, aih khoi jah claih ca tôiq lô; ² 'màng aih hì leq pì òi rìh ta chac hamac, èh apaq tiaq biac con mangai ma ham enh, mahaq tiaq manoh enh da Boc Pình. ³ Ta òi ca hì ma adroi pì khoi broq tiaq manoh enh da mangai ùh tiaq Chuaq, caq òi tiaq trong manhài trà, tiaq manoh ham enh, bù bia, caq ôq ùh amàn, pagôq racaih, wa cùh waiq dua 'mù đàng ca ramòt. ⁴ Manàiq wì haq hamàih hnoq pì ùh pajùm ti wì haq caq òi tiaq biac bù bacc ùh loh cleq, èh wì haq wìh hlài capoch 'mèq ca pì. ⁵ Mahaq atìq cô èh wì haq ep anoi pa'noh ca Haq khoi hamang òi hadrah mangai rìh wa mangai cachit. ⁶ Taiq 'màng aih raq Bàu Lem hadai khoi jah anoi 'noh ca mangai adroi ca wì cachit, 'nhac ca wì haq ep chiùq cachit tiaq hadrah Boc Pình khoi pajaq, manàiq cô wì haq jah rìh hloi hloi ti Boc Pình nhò Yiang Hadròih.

Patìh Biac Chuaq

⁷ Hì lùch da rìm biac khoi ten trùh, 'màng aih ep i manoh 'nì loq ro rang wèq dadèh òi waiq khàn. ⁸ Enh 'nhèq òng pì khòh loq waq ca dabau òi ca manoh, ma jah 'màng can loq waq jah glàp đac bacc tôiq lô. ⁹ Pì khòh òi yòc dabau, apaq mamùc. ¹⁰ Rìm ngai ta pì khòh broq tiaq biac hnhu am ma Chuaq khoi am, patìh ca dabau, tiah ca mangai loq wèq lem biac am dech crài ca dabau da Boc Pình khoi am. ¹¹ Mangai leq anoi hnài, èh phai anoi 'noh tiaq bàu da Boc Pình doi. Tàng i mangai ma patìh, èh patìh òi dèh ca padren Boc Pình am, waq ca Boc Pình

jah 'ngah 'ngai ta rìm biac nhò Chuaq Jêxu Crich ma jah i can 'ngah 'ngai wa i cwiang itai hloi hloi ùh lùch. Amen.

Chiuq Xa Ti Chuaq

¹² Ôi oh daq au dìq jaq loq waq, apaq hamàih ta manoh jò pì glàm biac jìq xa dìq jaq trùh ðòiq 'bàt thù manoh pì, tiah ca glàm mòiq biac laq lai, ¹³ mahaq pì khi jah wiang genh biac jìq xa da Chuaq Jêxu Crich toq leq, èh lem bùi toq aih beq, ðòiq trùh hì 'ngah 'ngai da Haq mahno loh, èh pì hadai jah lem bùi dìq jaq. ¹⁴ Tàng pì chiuq wì jù lê taiq pì tiaq Chuaq Jêxu Crich, èh pì jah xôq ramõt, ma jah 'màng aih can 'ngah 'ngai Yiang Hadròih da Boc Plình 'nang òi ta pì.

¹⁵ Òi ta pì apaq i cabô leq chiuq xa troi mangai jêh đac mangai, troi mangai atùng, troi mangai ngang dù, troi mangai capoch baxrùq biac mangai 'noi. ¹⁶ Mahaq tàng i cabô chiuq xa taiq broq con caiq Chuaq, èh apaq camaih, mahaq manè pôi Boc Plình beq taiq khi jah pòq hiniq aih. ¹⁷ Taiq jò khi trùh biac hadrah phai baxèm ta Tagop Hadròih da Boc Plình, 'màng aih tàng biac hadrah baxèm ti bèn, èh biac pulùch da 'bài mangai ùh ði tiaq Bàu Lem da Boc Plình jah loh 'màng leq? ¹⁸ Èh hò: “Tàng mangai ta-atoq xôq xa ca jah dèch,

èh 'bài mangai ma ùh tiaq Boc Plình wa broq tôiq lô, jah wìa 'màng leq?”*

¹⁹ 'Màng aih 'bài mangai leq chiuq nan xa tiaq manoh Boc Plình enh, khòh broq biac lem wa am dèh mahua yiang ca Haq ma khi broq plình crông taneh, Haq ma wèq dèh bàu.

5

Wèq Ban Con Caiq Chuaq

* 4:18 4:18 BR 11:31

¹ Au gòi bàu pariaq cô ca 'bài craq Tagop Hadròih ma broq gàu ta pì, ma jah 'màng aih au hadai craq broq gàu tiah ca wì, mangai khoi hnoq bìac jìq xa da Chuaq Jêxu Crich, wa hadai i phần ta bìac 'ngah 'ngai jò Chuaq mahno loh, ² wèq ban con caiq da Boc Plình khoi jao ca pì beq; broq bìac aih ùh xài taiq pa-àu mahaq bùi manoh, pì broq ùh xài taiq ham ca 'bac waq ca i lòiq, mahaq taiq i manoh enh broq òiq ca jaq, ³ ùh xài broq craq padit ca con trùu Chuaq khoi am ca pì wèq ban, mahaq ep broq dua lem ca wì haq. ⁴ Jò Mangai Ban Trùu Broq Gàu trùh, pì jah côi cadoh 'ngah 'ngai ùh taclah.

⁵ Hadai 'màng aih, 'bài gu calô 'yoh hanam phai loq òi tiah wì ma khoi bàc hanam. Rìm ngai yóc bìac loq paha'neq òadèh patìh ca dabau beq, ma jah 'màng aih: “Boc Plình tajraq hlài ca mangai loq catèh, mahaq am xôq ramõt ca mangai loq paha'neq òadèh.”*

⁶ 'Màng aih, paha'neq òadèh loh enh 'neq ca capiang ti cwàng itai da Boc Plình beq, waq ca Haq jah òèch pì trùh jò troq, ⁷ jao am òng òiq rìm bìac pì ma lèt ca Boc Plình beq, ma jah 'màng aih Haq i manoh wèq ban pì.

⁸ Ep wèq òadèh wa rìu hmàng beq, taiq haq ma git ca pì aih can kiac Satan, haq tiah ca baco hlari ca-ùm, lam rinh òudan ca pì, ti chaq ngan mangai leq haq jah caq jêh òac. ⁹ Yòng cajap ta manoh lùì tajraq hlài ca haq beq, ma jah 'màng aih bèn loq oh òaq bèn òi jàp ta cõng tanèh hadai pajùm chiuq xalep.

¹⁰ Waiq xìn Boc Plình da rìm bìac am òech ma khoi creò ca pì mùt ta can 'ngah 'ngai hloi hloi da Haq òi ta Chuaq Jêxu Crich, atìq ca pì chiuq xa òò òính toq 'biaq, cla Haq raq jah broq ca pì gèh tòm, cajap cajình wa am tam padren,

* 5:5 5:5 BR 3:34

¹¹ cwiàng itai wa can 'ngah 'ngai ỏi ta Haq hloi hloi ùh lùch. Amen.

Bàu Hmàih Pulùch

¹² Au nhò Sila, mangai au ngan tiah dèh ca oh daq wa dìq dèh ca manoh jùp au ta bìac Chuaq, achìh thò cô ðòiq pariaq pì, anoi hlài ca pì loq cô bìac am dech joq 'nàng da Boc Plình, pì ep yòng cajap ta aih beq!

¹³ Tagop Hadròih da 'bài mangai jah ràih ỏi ta Ba-bi-lôn gòi bàu bòch hmàih pì, wa Mốc, au doi tiah ca con au, hadai gòi bàu hmàih. ¹⁴ Oh daq khòh yốc bàu loq waq hmàih ca dabau ỏi ta Chuaq Jêxu Crich.

Waiq xìn can catèm ỏi ti dìq ðống pì ta Chuaq Jêxu Crich. Amen.

Sech Hadròih
Sech Hadròih

Copyright © 2020 Wycliffe Bible Translators, Inc.

Language: Hre

Contributor: Wycliffe Bible Translators, Inc.

Published: 2015 Nhà Xuất Bản Tôn Giáo
All rights reserved.

2020-11-17

PDF generated using Haiola and XeLaTeX on 11 Feb 2021 from source files dated 10 Feb 2021

e5023a07-9831-5256-a315-1cae0f33043d